



11. august 2010

UKA 2010/38

Inatsisartut suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

**Meerartaarnermut atatillugu aningaasaateqarfiliornissaq siunertaralugu inatsisissatut siunnersuummik Naalakkersuisut suliaqaqqullugit Inatsisartut aalajangiiffigisassatut siunnersuut. Aningaasaateqarfiup sulinermikkut akissarsiallit meerartaarnermut atatillugu akissaateqartinneqarnissamut periarfissaqanngitsut ullormusiaqartitsinermit pioreersumit pitsaanerusemik akissaateqalernissaat qulakkiissavaa, taakkua pisortani imaluunniit namminersortuni sulisuunerat apeqquataatinnagu.**

(Inatsisartunut ilaasortaq Naaja Nathanielsen, Inuit Ataqatigiit)

### **Tungavilersuut**

Meerartaarnermut aningaasatigut nalituvoq. Angajoqqaat amerlanernerit meeqqap qaammatini siullerni najornissaa kissaatigisarpaat, ilaqutariilli amerlasuut meerartaarnermut/angajoqqaanngornermulluunniit atatillugu sulinngiffeqarnissamut periarfissarititaasut atussallugit tamakkiisumik akissaqarneq ajorput. Tassani pissutaavoq anaanarpasuit ataatarpassuillu ullormusiaqartitaanermut atasuummata, tassa suliffitik aqutigalugit meerartaarnermut/angajoqqaanngornermulluunniit atatillugu sulinngiffeqarnissamut akissarsiaqartitaanatik.

Meerartaarnermut atatillugu aningaasaateqarfik angajoqqaanngorlaat pitsaanerusemik toqqis-sisimanarnerusemillu aningaasaqarsinnaanerannik kinguneqartitsisissaaq. Tamatuma saniatigut pisortani namminersortunilu sulisitsisut tamarmik meerartaarnermut atatillugu sulinngiffeqarnermut sulisuminnut akissarsiaqartitsinissamut periarfissaqalissapput, aningaasartuutisat tamakkerlugit matussusinngikkaluarlugit.

Meerartaarnermut atatillugu sulinngiffeqarnermut aningaasaateqarfiup inuusuttut suliffeqarnissaasigut pitsanngorsaavigissavai. Arnat inuusuttut meerartaarnissaminnut piukkunnarsisut atorfinitsinnissaannut aningaasatigut eqqarsaatersuutit pisariaarutissapput, inuusuttullu suliffinnik aallarniisut ilaqutartaarnissaminnut aningaasatigut periarfissarissaarnerulissallutik.

Meerartaarnermut atatillugu aningaasaateqarfiliornissaq ukiuni kingulliunerusemi arlaleriarluni oqaluserineqartarsimavoq. Naalakkersuinermit suliniaqatigiiffiit tamarmik isuma taman-na tapersersortareersimavaat. Assersuutigiinnarlugu meerartaarnermut atatillugu aningaasaateqarfiliornissaq siusinnerusukkut Naalakkersuisooqatigiissimasut naalakkersuisunngortitsinermit isumaqatigiissutiminnut ilaatittarsimavaat. Demokraatit aammalu Atassut-ip siunertaq tamanna aamma soqutigalugu tapersersoreersimavaat. Taamaammat isumaqarpunga angunia-gaq sukkatsisassallugu maannakkut piffissanngortoq.

Suliffeqarnermut tamarmiusumut atuuttumik Island-imi aammalu Sverige-mi qitiusumik meerartaarnermut atatillugu sulinngiffeqarnermut aningaasaateqarfeqareerpoq, aningaasaateqar-

fimmut akilersuutit ilaat aningaasarsiassat tamarmiusut ilaannit nakkartinneqartarlutik. Norge-mi Tuluillu Nunaanni meerartaarnermut atatillugu aningaasaateqarfiit akileraarutigut aningaasalersorneqartuupput. Sulisitsisunut namminersortunut tamanut atuuttumik Danmark-imi 2006-imit meerartaarnermut atatillugu sulinngiffeqarnermut aningaasaateqarfeqareerpoq, sulisitsisunit maannakkut tamakkiisumik atorfeqartitamut ataatsimut qaammammut 725 kr-i aki-liutigineqartarluni.

Iluseq/aaqqiissuutissaq sorleq Nunatsinni suliffeqarnikkut tulluarnerpaajussanersoq inatsisisatut siunnersuutissap suliarineqarneranut atatillugu sukumiinerusumik misissorluaqqaagassaavoq. Aningaasaateqarfiup aningaasalersorneqarnera sulisitsisut sulisartullu kattuffiisa aamma aningaasalersueqataaffigisinnaaneraat imaluunniit Namminersorlutik Oqartussat kisi-miillutik aningaasaliissanersut ilanngullugu qulaajarniagassaavoq.

Meerartaarnermut atatillugu aningaasaateqarfik pilersinneqarpat isumaqarpunga erninermut atatillugu sulinngiffeqarnermut inatsisit nutarterneqarnissaanut periarfissatsialaalissasoq, siunertaralugu sulinngiffeqarnerup sivitsorneqarnissaa, ilaqutariit erninermut atatillugu periarfissaasa eqaallisarneqarnissaat aammalu angajoqqaat erninermut atatillugu sulinngiffeqarnermi peqataanissaminnut periarfissaasa pitsanngorsarniarlugit